



ՎԵՀԱՓԱՌ ՀԱՅՐԱՊԵՏԻ ՇՆՈՐՀԱԲԵՐ ԱՅՅԸ ԱՐԱՐԱՏՅԱՆ ՀԱՅՐԱՊԵՏԱԿԱՆ ԹԵՄ

Հայրենիքում գործող Հայրենակցական միությունների ընդհանուր խորհրդի խնդրանքով դեկտեմբերի 17-ին քաղաքամայր Երևանի առաջնորդանիստ Ս. Սարգիս եկեղեցում մատուցվեց հոգեհանգստի և պատարագ՝ Օսմանյան Թուրքիայի կողմից Առաջին աշխարամարտի ժամանակ իրագործված ցեղասպանության զոհ մեր ժողովրդի զավակների հիշատակին:

Մարդաշատ էր Ս. Սարգիս եկեղեցին այդ օրը: Հոգևոր մխիթարության զգացումը պարուրել էր ամենքին, քանզի եպիսկոպոսական այդ պատարագին մասնակից հավատավոր մեր զավակներին իր բարեհաճ այցին արժանացրեց Ամենայն Հայոց Կաթողիկոս Ն. Ս. Օ. Տ. Տ. Գարեգին Ա Վեհափառ Հայրապետը: Սուրբ պատարագը մատուցում էր Արարատյան հայրապետական թեմի առաջնորդական փոխանորդ Գերաշնորհ Տ. Գարեգին արքեպիսկոպոս Ներսիսյանը, որը «Տերունական աղոթք»-ից առաջ թեմի հսկատացյալների անունից բարիգալստյան ու որդիական երախտիքի խոսքեր ուղղեց Հայոց Հորը շնորհաբեր աչքի համար և, դիմելով հավատացյալ ժողովրդին, հորդորեց աղոթք հղել առ Արարիչն Աստված՝ վասն Վեհափառի կենաց արևշատության և ձեռաց բոլոր գործերի հաջողության:

Այնուհետև Սրբազան Հայրը հրավիրեց Վեհափառ Հորը և խնդրեց իր Հայրական օրհնությունն ու Հայրապետական պատգամը տալու հավաքվածներին:

Վեհափառը գոհունակության ու գնահատանքի խոսքեր ուղղեց Հայրենակցական միության խորհրդին՝ նմանօրինակ միջոցառումներ կազմակերպելու և ցեղասպանության 80-ամյա տարելիցի ավարտի ալս օրերին հայ ժողովրդի հարության հրաշալի խորհուրդը մեր սևեռակետի առջև դնելու համար, ողջունեց նաև Արարատյան հայրապետական թեմին՝ այս իրադարձության հյուրընկալը լինելու կապակցությամբ: Նորին Սուրբ Օծությունը նըշեց, որ ինքը հնարավորություն չունեցավ մասնակցելու Հայրենակցական

միությունների կազմակերպած բոլոր տոնակատարություններին, որոնք քաղաքային մակարդակի վրա կազմակերպվում են իրենց կորսված հայրենիքի հիշատակին ու նոր հայրենիքի վերածնունդին: Բայց այսօրվա պատահագին «ցանկանալով ցանկացալ» ներկա գտնվել ու բաժանել բոլորիս ապրումները, որոնք «հոգեկան կյանքի բարձրակետը լինելու կոչված ապրումներն են»: Կարևորելով, որ մենք համախմբվել ենք ոգեկոչելու հիշատակը ավելի քան 1,5 մլն. մեր զոհերի, հավաքվել ենք հիշելու նրանց, Վեհափառը շարունակեց, որ «մենք պարտ ենք ոչ միայն լույս մտաբերել, այլ նաև հաղորդվել նրանց» և, նոր ուժ ու մղում ստանալով, «անցյալը ներկա դարձնել», մեր այսօրն ապրելու դասը սովորել», «քանզի նրանք ներկա են ապրողներիս մեջ, ու թեև մեռած, սակայն չկորան»: Սա է խորհուրդը «հիշել» գաղափարի, ընդգծեց Վեհափառ Հայրապետը:

Այնուհետև Հայոց Հայրապետն ավելացրեց, որ ինչպես հին մյուռոնը, լցվելով նորի վրա, նոր կյանք է տալիս մեզ բոլորիս, այնպես էլ մեր նահատակների սուրբ հիշատակը, անցյալից գալով, շաղախվելով ու խմորվելով մեր մեջ, ուժ ու կորով է հաղորդում մեզ: Մենք տնտես ենք այս աշխարհում ու պարտավորություններ ունենք Աստծո, Եկեղեցու և ազգի, մշակույթի ու մարդկության առաջ: Ու երբ մի որևէ պարտականություն ենք կատարում, հիշենք Ավետարանի պատգամն ու ասենք. «Մենք անախտան ծառաներ ենք, ինչ պարտ էինք անել, արեցինք ո՛չ թե մեր փառքի, ո՛չ թե մեր անունի կամ շահի համար, այլ առ Աստված մեր պարտականության համար», և շատ էլ չխոսենք իրավունքի մասին, որը միայն Աստծունն է, այլ մտածենք մեր պարտավորությունների մասին, քանզի «պարտականության միջից է միայն, որ մենք իրավունք կունենանք իրավունք ունենալու», և հիշենք, որ մեր հայրերը կյանքով իրենց պարտքը վճարեցին Աստծուն:

Վերջում Վեհափառ Հայրապետը փառք տվեց Աստծուն, որ ձախողվեց թշնամու «Հայաստանն առանց հայի» թողնելու ծրագիրը: ...Այսօր, փակելով ցեղասպանության 80-ամյակի տարին, մահվան միջից կյանքի պատգամն ու հարության շունչը, մահվան դեմ հաղթանակի ու կյանքի հավերժության շունչն է փոխանցվում մեր ժողովրդին: Առաջ գնանք՝ դեպի կյանք, ու կյանքով պատասխանենք ցեղասպանությանը, քանզի ազատ ու անկախ Հայաստանն այսօր ցեղասպանության պատասխանն է:

Նորին Սուրբ Օծությունը, ավարտելով իր խոսքը, հորդորեց նոր պետականության պայմաններում նորոգվել և ուխտել. «Ցեղասպանությունից նոր ուժ քաղել, նոր կյանքով լցվել», ու վա՛յ մեզ, եթե չնորոգվենք ու չվերափոխվենք, հույսի, լույսի մեր այս հայրենիքում չդառնանք հոգու ժողովուրդ: Հայոց Հայրապետը պատգամեց՝ չվախենալ դժվարություններից ու նայել ապագային՝ «վասն Աստծո փառքի, վասն շինության մեր Հայրենիքի, վասն անասանության մեր պետության և վասն պայծառության Եկեղեցվոյս Հայաստանյայց»:

ԱՆԱՀԻՏ ՍԵՂՈԱԿՅԱՆ

Արարատյան հայրապետական թեմի
Քարոզչական կենտրոն